



## UTM catat kedudukan pertama Graduan Tahap Kemahiran Tinggi

Oleh **Omar Ahmad** - Julai 10, 2023 @ 7:51am  
[bhnews@bh.com.my](mailto:bhnews@bh.com.my)



Foto hiasan

**JOHOR BAHRU:** Universiti Teknologi Malaysia (UTM) terus melakar kecemerlangan apabila buat pertama kali mencatatkan kedudukan pertama, bagi kategori Graduan Tahap Kemahiran Tinggi, dengan kadar 85.4 peratus.

Naib Canselor UTM, Prof Datuk Dr Ahmad Fauzi Ismail, berkata UTM juga kekal mengungguli tempat pertama dalam kalangan universiti awam (UA) di Malaysia bagi kategori Graduan Berpendapatan Premium (Ijazah Sarjana Muda), berdasarkan Laporan Penuh Kadar Kebolehpasaran Graduan (GE) 2022 yang dikeluarkan oleh Kementerian Pendidikan Tinggi (KPT) pada 5 Julai lalu.

Katanya, pencapaian itu sekali gus mengekalkan keunggulan UTM selaku universiti perintis bagi Graduan Berpendapatan Premium di Malaysia.

"Pencapaian ini dilihat mengukuhkan kedudukan UTM sebagai universiti peneraju dalam memperkasa agenda Latihan dan Pendidikan Teknikal dan Vokasional (TVET) aras tinggi sebagaimana yang digariskan oleh Menteri Pendidikan Tinggi, Datuk Seri Mohamed Khaled Nordin.

"Ia juga selaras dengan agenda pelan strategik enVision UTM 2025 yang memfokuskan kepada kemenjadian graduan yang berorientasikan masa hadapan dan berkemahiran tinggi menerusi program akademik berkualiti, relevan dan berimpak tinggi", katanya menerusi satu kenyataan di sini, hari ini.

Ahmad Fauzi berkata, UTM terus mengekalkan kecemerlangan dalam aspek kebolehpasaran graduan (GE) secara keseluruhan dengan kadar 99 peratus.

Katanya ia sekali gus berada dalam kedudukan tiga teratas di peringkat nasional.

"Pencapaian ini turut dibuktikan melalui sebanyak 80.3 peratus daripada graduan yang dihasilkan telah berjaya menempatkan diri dalam industri.

"Antara faktor kepada peratusan ini adalah berkait rapat dengan hubungan strategik UTM dengan pihak industri dan agensi yang akrab dan lestari.

"Hubungan sinergistik yang bersifat jangka panjang dan lestari antara pihak UTM bersama pihak industri, agensi dan alumni menyumbang secara langsung dalam memberikan manfaat kepada graduan, khususnya menerusi peluang pekerjaan", katanya.

Pengukuran kadar kebolehpasaran graduan (GE) sebagaimana yang digariskan oleh KPT adalah meliputi graduan yang bekerja, melanjutkan pengajian, meningkatkan kemahiran dan menunggu penempatan pekerjaan dalam tempoh enam bulan selepas tamat pengajian.

Secara keseluruhan, pencapaian UTM berdasarkan Laporan Penuh Kadar Kebolehpasaran Graduan (GE) 2022 menunjukkan universiti ini berada pada landasan yang tepat dalam menjayakan visi dan misinya untuk kekal terampil sebagai Universiti Ulung Kejuruteraan negara.